

NEWSLETTER

novembar 2024.



FONDACIJA
HASTOR

Olga Dedić

FONDACIJA HASTOR OSIGURALA STIPENDIJE ZA UČENIKE S PODRUČJA POGOĐENIH POPLAVAMA

Nakon što je u oktobru dijelove Bosne i Hercegovine pogodila teška prirodna nesreća, razorne poplave, čije posljedice društvo osjeća i danas, Fondacija Hastor našla se na licu mjesta među stanovništvom pogođenih područja i pružila ruku pomoći koja je u tom momentu bila i više nego značajna.

Naš tim je vrijedno čistio, pomagao i razgovarao sa stanovništvom Donje Jablanice, Fojnice... Ipak, željeli smo pomoći još više.

Fondacija Hastor će stipendirati 73 učenika sa područja Hercegovačko-neretvanskog kantona. Riječ je o učenicima, stanovnicima područja pogođenih poplavama, koji će biti dio Fondacije Hastor, primati mjesečnu stipendiju tokom svih 12 mjeseci u godini i

volontirati kao i svi stipendisti, te na naj način raditi na razvoju svojih vještina i kompetencija i tako direktno doprinosti razvoju lokalnih zajednica u Bosni i Hercegovini.

Trenutno je u fazi i finaliziranje postupka kada je riječ o učenicima iz Srednjobosanskog kantona, koji je također bio pogođen prirodnom nesrećom, te će i oni, poput učenika iz HNK, dobiti priliku da postanu stipendisti Fondacije Hastor.

Fondacija Hastor će i u ovim, kao i u svim drugim okolnostima, ostati vjerni prijatelj svih građana Bosne i Hercegovine i dati svoj maksimum da našu društvenu zajednicu napravimo što boljom i ugodnijom za sve nas. Zajedno možemo pobijediti svaki izazov!



FONDACIJA HASTOR IZLAGAČ NA DEVETOM DJEČIJEM SAJMU



Početak mjeseca novembra u Fondaciji Hastor donio je radost, dječije osmijehe i razigranost, na šta niko ne može ostati imun.

Devetog i desetog novembra održan je deveti po redu Dječiji sajam, najveći festival za djecu i porodicu u Bosni i Hercegovini. Ovaj događaj godinama unazad privlači veliku pažnju porodica i posjećenost iz godine u godinu sve je veća. Imali smo zadovoljstvo biti izlagač na ovogodišnjem sajmu i prirediti sjajnu zabavu za mališane te ih adekvatno nagraditi. Kao i prethodnih godina, i ove je godine sajam imao glavnu temu i moto.

Tema 9. dječijeg sajma bila je mentalno zdravlje djece uz moto "**Bez briga – samo igra**". Kao izlagač, Fondacija Hastor maksimalno se posvetila da ukaže na značaj mentalnog zdravlja djece te su naši predstavnici u sklopu sajma prisustvovali i panel-diskusijama o ovoj temi.

Za one najmlađe posjetioce sajma spremili smo takmičenje za najbolji likovni/literarni rad

o temi "Moja učiteljica/odgajateljica". Nakon završetka dvodnevnog sajma pobjednicima je uručena nagrada. Bilo je i onih koji su nas kupili svojom kreativnošću i vedrinom te smo nagrade dijelili i tokom trajanja sajma.

Još je jedan uspješan događaj iza nas, a mi se s nestrpljenjem spremamo nove.



Hana Kazić

Fotografija nije samo umjetnost. Fotografija je način da se pokažeš svijetu, a da ostaneš potpuno vjeran sebi, istakla je svojevremeno Dorothea Lange.

Ova misao savršeno odražava duhovnu srž rada **Hane Kazić**, talentirane fotografkinje i stipendistice koju s ponosom predstavljamo kao našu stipendisticu mjeseca. Kroz svoj rad Hana ne samo da inspirira svijet oko sebe već ističe i svoju jedinstvenu perspektivu, koristeći umjetnost fotografije kao alat za iskazivanje svojih osjećaja, stavova i identiteta. Studentica je Grafičkog dizajna i multimedije na Internacionalnom Burch univerzitetu u Sarajevu.

Hana svoje volontiranje u Fondaciji Hastor doživljava s izuzetnom ozbiljnošću i predanošću, naročito profesionalno i odgovorno. Ističe da je duboko zahvalna na materijalnoj podršci i, što je još važnije, iskustvu koje joj Fondacija pruža.

Velika mi je čast što sam izabrana da postanem stipendistica Fondacije Hastor. Volontiranje mi je omogućilo da steknem nova prijateljstva i dragocjeno iskustvo. To je, ustvari, ključna karika koja mi omogućava da nastavim rasti, učiti i razvijati se u svim aspektima života i karijere. Sretna sam što imam priliku biti dijelom jedne uspješne i divne porodice kao što je Fondacija Hastor.




Hana od djetinjstva pokazuje snažnu strast prema umjetnosti, koja je za nju oduvijek bila utočište za neiskazane emocije. Kroz svoju umjetnost pronalazi način da izrazi ono što nije mogla prenijeti riječima, a njeno obrazovanje na polju grafičkog dizajna i multimedije omogućava joj da dalje razvija svoju kreativnost i vještine u ovoj oblasti.

Jedna od prvih fotografija Hane Kazić, koju je napravila za midterm iz fotografije, prošla je na prvom Sarajevo Photography Festivalu u kategoriji "Life", na što je izuzetno ponosna. Godinu dana nakon toga, njezina serija fotografija za kategoriju "Fashion" također je ušla među finaliste festivala. Ovaj uspjeh bio je važan trenutak u njenoj karijeri, no Hana priznaje da je prije svega toga, kao i sada, suočena s vlastitim strahovima od neuspjeha.

Najveći uzor u njenom životu jeste njen otac, koji ju je od malih nogu učio vrijednostima samostalnosti i truda, pa ga s ponosom ističe kao svog najvećeg mentora i inspiraciju:

Moja najveća inspiracija u životu jeste moj otac, čovjek koji je sve stvorio svojim rukama i u vrlo teškim uvjetima. Ovom se prilikom posebno zahvaljujem svome ocu na velikom trudu i radu.

Na kraju, Hana pokazuje kako je podrška Fondacije Hastor, zajedno s podrškom porodice, ključna za njen lični i profesionalni rast. Kroz volonterski angažman mladi ljudi poput nje ostvaruju svoje ciljeve, jer uz takvu podršku svaki izazov postaje prilika za napredak i ostvarenje snova.



Članak pripremila: **Sanita Fuško**

Uz ambiciju i podršku do zvijezda

Berina Tihčić, četrnaestogodišnja djevojčica iz Sarajeva, učenica 9. razreda Osnovne škole "Pofalići" i stipendistica Fondacije Hastor, već je postigla značajne uspjehe u sportu i na drugim poljima. Njena strast prema sportu, posebno taekwondou i fudbalu, kao i posvećenost obrazovanju, čine je pravim uzorom za vršnjake i sve mlade ljude, te je s razlogom priča o ovoj uspješnoj djevojčici našla svoje mjesto unutar Rubrike aktivnih mladih.

Berina je svoju ljubav prema taekwondou razvila još u vrlo ranoj dobi, sa samo četiri i po godine. Inspiraciju za treniranje dobila je od svog brata, koji se bavio taekwondo. Iako je njen brat odustao, Berina je nastavila s treniranjem i to je postala njena velika strast. Danas trenira četiri do pet puta sedmično, a njeni trenuci u taekwondou uključuju zagrijavanje, rad s opremom te borbe, koje su joj najdraži dio treninga. Uz disciplinu u ishrani i fizičke izazove Berina je naučila da se nosi sa psihičkim izazovima, kao što je trema pred takmičenja. Iako je nekada imala problema s tremom, danas se uspješno nosi sa svim izazovima.




Najveći uspjeh u taekwondo karijeri Berina je postigla kao državna prvakinja, a sa pobjedama se nosi s velikom skromnošću, uvijek naglašavajući da nijedna pobjeda ne znači opuštanje, već dodatnu motivaciju za još jači rad. Na poraze gleda kao na priliku za rast i napredak. Motivaciju za nastavak svog sportskog puta Berina pronalazi u podršci svoje porodice, trenera, ali i u svojoj unutarnjoj želji da bude još uspješnija.

Berina se također bavi fudbalom – igra za ŽFK "Respekt" već pet godina i članica je U15 Reprezentacije Bosne i Hercegovine, a pored toga, aktivna je i u Odredu izviđača "Pofalići" već pet i po godina. Njen svestran pristup životu i sportu ističe je kao osobu koja voli izazove i koja ne poznaje granice kada je riječ o učenju i napredovanju.

Naša vrijedna stipendistica u budućnosti planira nastaviti s takmičenjima, a njen cilj je osvojiti prvo mjesto na Balkanskom kupu u Bugarskoj, te da jednog dana pristupi Reprezentaciji Bosne i Hercegovine u taekwondou. Osim toga, Berina mašta o karijeri trenera, što je još jedan dokaz njene posvećenosti sportu i želje da pomogne mladim sportistima da postignu svoje ciljeve.

Fondacija Hastor je njena velika podrška u obrazovanju, a kroz volontiranje joj omogućava da stekne nova prijateljstva i iskustva. Berina već sada pokazuje izuzetan potencijal i sigurni smo da će nastaviti ostvarivati sjajne rezultate, kako na polju sporta tako i na polju nauke i obrazovanja. Njena poruka je jasna:

Nikada se nemojte predati, budite uvijek nasmijani i posvetite se zdravom životu kroz sport.



Članak pripremio: Lorens Stranjak

Snaga podrške: Kako je to Fondacija Hastor oblikovala život Nihade Sivić?

Nakon okončanja školovanja stipendisti Fondacije Hastor ostaju vezani za Fondaciju kao korijen za svoje drvo. Takvo korijenje teško je pokidati zbog veze koja umije biti izuzetno čvrsta i neraskidiva, koja je ispunjena pozitivnim emocijama i predivnim sjećanjima na period školovanja koji je ostao iza njih. Tako bivši stipendisti Fondacije Hastor njeguju povezanost s Fondacijom koja je nerijetko bila njihov glavni oslonac i podrška u životu. Alumni mjeseca je rubrika koja donosi upravo priče naših bivših stipendista, a ovog mjeseca to je priča **Nihade Sivić**.


Nihada je rođena u decembru 1994. godine i dolazi nam iz Bugojna. Osnovno i srednje obrazovanje završila je u Bugojnu, a nakon toga je nastavila školovanje u Sarajevu. Dodiplomski studij završila je na Filozofskom fakultetu u Sarajevu, na Odsjeku za anglistiku, a, kako ističe, oduvijek je privlačila veza između jezika, kulture i komunikacije. Nakon toga upisala je i drugi ciklus studija – Komunikologiju na Fakultetu političkih nauka u Sarajevu.



Smatram da je ova kombinacija obrazovanja bila idealan temelj za moj profesionalni razvoj, omogućivši mi da steknem široku perspektivu i multidisciplinarnu vještinu koje svakodnevno primjenjujem, istakla je je Nihada na samom početku našeg razgovora.

U periodu školovanja, dok gradimo sebe i svoju ličnost, velika je prednost biti dio porodice Fondacije Hastor koja nas podstiče i motivira da ostvarujemo što bolje rezultate i koja nas uči pravim ljudskim vrijednostima. Ipak, ove vrijednosti još više cijenimo onda kad odmaknemo u nove sfere života, upoznamo nove ljude i posvetimo se novim dešavanjima. Zahvaljujući Fondaciji, osjetila je podršku koja joj je bila potrebna i koja ju je oblikovala.

Sama činjenica da postoji neko ko vjeruje u vas i posvećuje se vašem dugoročnom razvoju govori mnogo o ulozi Fondacije u životima stipendista, kaže naša Nihada, a onda nastavlja, kroz godine podrške, osjećala sam se osnaženom i motiviranom da napredujem znajući da neko stoji iza mene kao oslonac u mom razvoju.



Na pitanje o tome kako je proteklo njeno volontiranje, ističe da je kao dugogodišnji volonter u administraciji Fondacije imala priliku steći dragocjena radna iskustva i navike koje su joj mnogo značile. Volontiranje je bila prilika da, uz radne vještine, razvije osjećaj odgovornosti i pripadnosti timu, što je izuzetno korisno za buduće profesionalne izazove.

Fondacija Hastor pruža i priliku za brojna prijateljstva, ali i nešto više, kao što je to slučaj kod naše Nihade. Najbliže prijateljstvo koje ona nosi iz Fondacije je zapravo s njenim suprugom, s kojim se upoznala radeći u administraciji Fondacije. Deset godina kasnije još uvijek su zajedno, sada i u braku. Nihada već dugi niz godina radi u autoindustriji, u kompaniji "Porsche Sarajevo", a zadužena je za marketing. Kako navodi, posao je dinamičan i zahtijeva stalnu prilagodljivost i kreativnost, a obuhvata i veliki broj zadataka. Međutim, rad na takvoj poziciji pruža joj priliku da svakodnevno radi s vrhunskim brendovima, što je izazovno, ali i vrlo ispunjavajuće.

Za sami kraj, zamolili smo Nihadu da ostavi neki poruku za sve naše stipendiste, a ona je to sasvim kratko i jasno izložila u jednoj rečenici: **Vjerujte u svoje ciljeve.**

Fondacija Hastor je tu kao oslonac, kao vjetar u leđa, i pomoći će svim svojim stipendistima da ostvare zacrtane ciljeve, ali samo ako i oni sami čvrsto vjeruju u ono što žele postići.

Članak pripremila: **Aida Suljić**

Klub za edukaciju

Razmišljajući o načinima kako ovoj skupini učenika pružiti priliku za dodatno usavršavanje iz oblasti koje su im zanimljive, Fondacija Hastor je u okviru novog modela volontiranja osnovala Klub za edukaciju, namijenjen isključivo odličnim učenicima. Članovi ovog kluba studenti su različitih fakulteta koji su još na samom početku imali ideje i vizije kako učenicima približiti oblasti koje ih zanimaju i kako ih podučiti onome o čemu žele znati više.

Nakon skoro godinu dana intenzivnog djelovanja Kluba za edukaciju u okviru Fondacije Hastor učenici i studenti našli su najbolje načine za ostvarenje i realizaciju svojih ideja te su ispisali izvrsne i inspirativne priče o jednom od najvažnijih aspekata Fondacije Hastor – mentorstvu. Učenici su na samom početku odabrali oblasti o kojima žele učiti, a naši studenti su svoja opća ili znanja s fakulteta koristili maksimalno nastojeći učenike zainteresirati i približiti im ono o čemu ne uče u školi. Tako je naš student Filozofskog fakulteta **Ivan Rajić** svojim učenicima pričao o svijetu muzike i, vodeći se najljepšim notama, djecu uvodio u nepregledne svjetove ove umjetnosti:

Radionice o svijetu muzike učenicima su dale veoma bitan uvod u ono što muzika znači. Kao i svaka druga umjetnost, ona je izražaj emocija i misli, a pored toga može sadržavati i veoma bitnu poruku. Moja uloga kao voditelja radionica nije bila da učenicima kažem koju muziku trebaju slušati, to bi bilo suludo, ali smo probali analizirati istinski razlog zašto muzika postoji i šta je dobra donijela svijetu. Radionice su bile konstruirane tako da se učenici opuste nakon iscrpljujućih sati u školama, i onda da u tom opuštenom stanju upiju neku informaciju koja će zadugo ostati zapisana, pa možda čak i zauvijek, istakao je Ivan Rajić.

Na samom kraju možemo kazati kako smo po ko zna koji put ponosni na naše stipendiste i trud koji svakodnevno ulažu kako bi volonterski proces bio što efikasniji i produktivniji i kako bi naši učenici stjecali što više znanja o kojem ne uče u školi. Vjerujemo da će i u budućnosti na putu koji je otpočeo Klubu za edukaciju jedina skretnica biti to da je obrazovanje izbor pobjednika te da će naši učenici i studenti stipendisti uvijek birati ovakve puteve. Radujemo se svim budućim pričama koje će nam donijeti članovi kluba.



Ogledalo duše

Ljubav mladih, nježna poput vjetra što se opire,
u očima im svjetlost sja koja se uvijek vraća.
Svaka riječ izgovorena kao otkucaj srca,
a svaki osmijeh svijet je što u njima raste.

Ljubav mladih, u njoj nema prošlosti ni težine,
samo nada u svakom koraku, svaki poljubac – čežnje.

Kad se ruke spoje, sve drugo nestaje,
svijet je malen, ali srce im širi granice.

Oni vole kao da je svaki trenutak prvi,
kao da će zauvijek trajati ta nježna iskra u njima.

I dok mjesec sjaji nad gradom u noći,
mlada srca sanjaju – o vječnosti, slobodi,
i ljubavi što ne gubi moći.

Lamija Sejdić



Kako postati donator?

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa:

ASA Banka d.d. Sarajevo:

1346101000825159

Raiffeisen Bank BH d.d. Sarajevo:

1610000055230065

Unicredit Bank d.d. Sarajevo:

3389002201775656



FONDACIJA
HASTOR



Kontaktirajte nas!

Bulevar Meše Selimovića
16, Sarajevo
033 774 789
033 774 823
fondacija@hastor.ba



Redakcija

Dženana Zulum
Amina Bašić
Sanita Fuško
Lorens Stranjak
Aida Suljić
Lamija Sejdić



Grafički dizajn

Lejla Fejzić



Naslovnica

Nejla Dedić